

# Informasaun atu uza hamutuk livru *Moris Kristaun no Haklaken*

## 3-9 AGOSTU

RIKUSOIN HUSI BÍBLIA | ÉXODO 13-14

**“Hamriik metin, no haree oinsá Jeová sei salva imi “**

(Éxodo 14:13, 14)

w13-E 2/1 p. 4

**Moisés mak mane ne’ebé iha fiar metin**

Moisés karik la hatene katak Maromak sei fahe Tasi Mean atu nasaun Izraél bele liu. Maski nune'e, Moisés fiar Maromak sei halo buat ruma atu proteje Ninia povu. No Moisés hakarak ema Izraél sira mós iha fiar ne’ebé metin. “Moisés dehan ba povu ne'e: ‘Keta ta'uk. Hamriik metin, no haree oinsá Jeová sei salva imi ohin.’” (Ex 14:13) Moisés ho susesu hametin duni nasaun ne'e nia fiar ka lae? Sin, Bíblia hatete kona-ba povu hotu ne'e: “Liu-husi fiar mak sira hakur Tasi Mean hanesan la'o iha rai maran.” (Ebr 11:29) Moisés nia fiar la'ós de'it lori di'aik ba ninia an maibé mós ba ema Izraél.

(Éxodo 14:21, 22)

w18.09 p. 26 par. 13

**Maromak ne’ebé kbiit boot liu hotu hanoin ema**

<sup>13</sup> Imajina katak Ita mós iha Tasi Mean nia oin no tropa husi rai-Ejitu duni tuir husi kotuk. (Ex 14:19-22) Tuirmai, Maromak halo buat ruma. Kalohan ne’ebé iha Ita-nia oin muda fali ba kotuk hodi satan ema Ejitu no sira haree nakukun de'it. Maibé iha Ita-nia leet iha naroman. Tuirmai, Ita haree Moisés lolo ninia liman ba tasi leten no anin husi parte leste huu maka'as hodi fahe tasi ba rua atu loke dalan ba Ita. Ita hamutuk ho Ita-nia família no animál sira, no mós ema seluk hahú la'o ba tasi sorin iha dalan ne’ebé organiza tebes. Maibé Ita haree buat balu la hanesan baibain. Iha tasi-kidun la iha tahu no la namdoras, tasi-kidun maran, tan ne'e fasil atu hakur ba tasi sorin. Maski iha ema ne’ebé la'o neineik, maibé sira mós bele la'o ho di'aik ba tasi sorin.

(Éxodo 14:26-28)

w09-E 3/15 p. 7 par. 2-3

**Imi labele haluha Jeová**

Kuandu ema Ejitu sira halai ho sira-nia kudakarreta ne’ebé aat, ema Izraél hotu to'o tiha ona iha tasi-ibun iha parte leste. No agora Moisés lolo nia liman ba Tasi Mean. Depois, Jeová halo monu bee ne’ebé hanesan moru. Bee barak kona Faraó no ninia tropa sira no halo mout sira. Inimigu ida mós la moris. Izraél sai livre!—Ex 14:26-28; Sal 136:13-15.

Istória kona-ba akontesimentu ne'e halo nasaun sira ne’ebé besik sente ta'uk ba tempu ne’ebé kleur. (Ex 15:14-16) Depois tinan 40 liutiha, Raab husi Jerikó fó-hatene ba mane Izraél na'in-rua: “Ami hotu sai ta'uk tebes ba imi, . . . tanba ami rona ona oinsá Jeová halo maran Tasi Mean iha imi-nia oin bainhira imi sai husi rai-Ejitu.” (Jos 2:9, 10) Nasaun jentiu sira-ne'e la haluha oinsá Jeová salva ninia povu. Klaru katak Izraél mós iha razaua barak atu hanoin kona-ba nia.

**Ke'e no hetan buat murak husi Bíblia**

(Éxodo 13:17)

it-1-E p. 1117

**Dalan, Estrada ne’ebé liga sidade sira**

Iha tempu uluk, sidade sira iha rai-Palestina iha estrada no dalan ki'ik sira ne’ebé liga entre sidade sira-ne'e, no estrada sira-ne'e mak importante tanba ema uza hodi hala'o negósiu. (Núm 20:17-19; 21:21, 22; 22:5, 21-23; Jos 2:22; Juí 21:19; 1Sa 6:9, 12; 13:17, 18) Estrada ne’ebé boot liu iha tempu ne’ebá mak estrada husi Ejitu atu bá sidade Gaza no Askelon iha Filístia, no depois iha kurva uitoan bá parte leste ba Megido, no tuirmai bá Hazor iha Tasi Galileia nia parte norte, no bá fali Damasku. Husi Ejitu atu bá rai ne’ebé Maromak promete, dalan liuhusi Filístia ne'e mak dalan ne’ebé badak liu. Maski nune'e, ho laran-di'aik Maromak dirije povu Izraél atu liu husi dalan seluk, atu sira la hetan ataka husi ema Filístia no lakon sira-nia aten-brani.—Ex 13:17.

## (Éxodo 14:2)

it-1-E p. 782 par. 2-3

Sai husi Ejitu

### *Ema Izraél hakur Tasi Mean nia parte ida ne'ebé?*

Bainhira ema Izraél to'o ona parte segundu husi sira-nia viajen, ne'e mak iha Etam ne'ebé 'iha rai-fuik nia ninin', Maromak haruka Moisés atu "fila fali no hela iha Pihairot nia oin . . . besik tasi." Ne'e sei halo Faraó hanoin katak sira "la'o bilán de'it". (Ex 13:20; 14:1-3) Matenek-na'in sira ne'ebé dehan katak dalan el Haj nian mak dalan ne'ebé ema Izraél tuir bainhira sai husi Ejitu, hatete katak liafuan Ebraiku ne'ebé tradús "fila fali" mak la'ós de'it atu "sees" maibé signifika katak hakiduk no fila fali duni. Sira dehan katak, bainhira ema Izraél to'o ona tasi-sikun Suez nia parte norte, ema Izraél hakiduk no la'o ba foho sira naran Jebel 'Ataqah nia parte leste. Foho sira-ne'e iha tasi-sikun Suez nia sorin oeste. Se inimigu duni sira husi norte, susar ba ema Izraél ne'ebé lubun boot tebes atu sai lalais, tanba tasi mak hanetik sira.

Matenek-na'in barak iha hanoin ne'ebé la hanesan ho ida-ne'e. Maibé ema Judeu nia tradisaun husi apóstolu sira-nia tempu konkorda ho situasaun ne'ebé ita foin esplika iha leten. No importante liu mak istória iha Bíblia mós apoia. (Ex 14:9-16) Ita bele fiar katak fatin ne'ebé ema Izraél hakur tasi mak la besik liu ba tasi-sikun nia ulun (ka Tasi Mean nia parte oeste). Tanba se nune'e, ne'e katak fasil ba Faraó nia tropa sira atu hale'u de'it tasi-sikun nia ulun no hasoru ema Izraél sira iha sorin. Maibé sira la halo nune'e.—Ex 14:22, 23.

## TREINU KONA-BA HAKLAKEN

w07-E 12/15 p. 18-20 par. 13-16

"Hamriik metin, no haree oinsá Jeová sei salva imi"

<sup>13</sup> Saida mak povu Izraél halo bainhira sira hetan salvasaun liuhusi milagre ne'e? Moisés no mane Izraél sira kanta kendas hodi fó hahi'i ba Jeová! Sira kanta: "Ha'u sei kanta ba Jeová, tanba ninia glória mak boot tebes. . . . Jeová sei ukun nu'udar liurai tinan ba tinan ba nafatin." (Ex 15:1, 18) Sin, sira hakarak atu fó hahi'i kendas ba Maromak.

Jeová hatudu sai nia direitu atu ukun liuhusi akontesimentu ne'e.

<sup>14</sup> Oinsá mak akontesimentu ne'e bele fó kmaan, esperansa no lisaun mai ita? Ita bele haree duni katak Jeová bele rezolve situasaun naran de'it ne'ebé koko ninia povu sira. Nia bele de'it ajuda sira atu la'o liu situasaun susar ne'ebé bele hanetik sira. Tasi Mean mós labele hanetik povu Izraél kuandu Jeová halo anin huu maka'as. No nia mós bele halo Tasi Mean sai fali rate ba Faraó no ninia tropa sira. Hodí hanoin kle'an kona-ba buat sira-ne'e, ita mós bele fó sai liafuan hanesan buat ne'ebé hakerek-na'in salmo ida hatete: "Jeová iha ha'u-nia sorin; ha'u sei nunka ta'uk. Saida mak ema bele halo ba ha'u." (Sal 118:6) Ita mós bele hetan kmaan husi Paulo nia liafuan ne'ebé temi iha Roma 8:31: "Se Maromak hamutuk ho ita, sé mak bele kontra ita?" Liafuan sira-ne'e fó fiar duni mai ita, halakon ita-nia ta'uk no duvida, no fó ita esperansa! Tan ne'e, Eskritura tinan nian ba tinan 2008 mak di'ak tebes: "Hamriik metin, no haree oinsá Jeová sei salva imi!"—Ex 14:13.

<sup>15</sup> Saida tan mak ita aprende husi tempu ne'ebé Izraél sai husi Ejitu? Ita tenke halo tuir buat hotu ne'ebé Jeová husu ita. Povu Izraél halo tuir ho didi'ak kona-ba preparasaun ba Pásqua. Sira halo tuir Maromak hodi la sai husi uma-laran iha kalan 14 Nisan. Kuandu sira ikusmai sai husi Ejitu, sira sai "hanesan tropa". (Ex 13:18) Ohin loron, importante tebes atu halo tuir matadalan ne'ebé ita simu husi "atan laran-metin no matenek"! (Mt 24:45) Ita tenke rona didi'ak ba Maromak nia liafuan, ne'ebé dehan: "Se imi la'o sala dalan ba sorin loos ka ba sorin karuk, imi-nia tilun rasik sei rona lian ida husi imi-nia kotuk dehan: 'Dalan mak ne'e. La'o tuir ida-ne'e bá.'" (Isa 30:21) Nu'udar ita besik daudaun ba terus boot, karik ita sei simu informasaun liután. Ita bele liu loron susar sira-ne'e kuandu ita kontinua halo tuir exemplu husi Jeová nia povu sira ne'ebé laran-metin.

<sup>16</sup> Hanoin-hetan mós katak Jeová lori povu Izraél tama ba iha situasaun ne'ebé halo sira haree hanesan la iha tan dalan entre foho no Tasi Mean. Karik sira hanoin ne'e la'ós desizaun ne'ebé di'ak.

Maibé, Jeová kontrola buat hotu, no ikusmai buat hotu la'o ho di'ak atu nune'e Jeová bele hetan hahi'i no bele lori salvasaun ba ninia povu. Ohin loron, karik ita mós la comprende klaru tanbasá mak ita-nia organizasaun rezolve problema balu iha dalan ne'ebé oin seluk. Maski nune'e, ita nafatin iha razaun atu tau fiar ba Jeová liuhusi ema ne'ebé nia hili atu hato'o ninia mensajen mai ita. Dala ruma haree hanesan ita-nia inimigu sira atu manán ita. Tanba ita labele haree situasaun ida ho kompletu, ne'e hanetik ita atu hatene ho klaru situasaun ne'ebé akontese. Maski nune'e, Jeová bele halo buat naran de'it iha tempu ne'ebé loos, hanesan buat ne'ebé nia halo ona ba povu Izraél.

—Prv 3:5.

## 10-16 AGOSTU

### RIKUSOIN HUSI BÍBLIA | ÉXODO 15-16

#### "Hahi'i Jeová liuhusi knananuk"

#### (Éxodo 15:1, 2)

w95-E 10/15 p. 11 par. 11

#### Tanbasá tenke hamta'uk Maromak agora?

<sup>11</sup> Hodí halakon tropa Ejitu, Jeová hetan hahi'i husi sira ne'ebé adora Nia no halo nia naran boot iha fatin hotu. (Jos 2:9, 10; 4:23, 24) Ninia naran sai boot liu fali Ejitu nia maromak falsu sira ne'ebé la iha folin, ne'ebé hatudu katak labele salva ema sira ne'ebé adora sira. Fiar ba sira-nia maromak no ba ema sala-na'in no mós ba tropa nia kbiit lori susar atat tebes. (Sal 146:3) Ne'e book ema Izraél kanta knananuk hahi'i nian hodi hatudu sira-nia hamta'uk ne'ebé loos ba Maromak, ne'ebé ho kbiit boot salva ninia povu!

#### (Éxodo 15:11)

#### (Éxodo 15:18)

w95-E 10/15 p. 11-12 par. 15-16

#### Tanbasá tenke hamta'uk Maromak agora?

<sup>15</sup> Se ita mós foin hetan salvasaun no hamriük hamutuk ho Moisés, ita-nia laran mós book ita atu kanta: "Oh Jeová, husi maromak sira hotu, sé mak hanesan ho Ita? Sé mak hanesan ho Ita ne'ebé santu liu hotu? Ita mak Maromak ne'ebé ema

tenke hamta'uk ho knananuk hahi'i nian, Maromak ne'ebé halo buat kmanek sira." (Ex 15:11) Durante tinan atus ba atus ema barak mós iha hanoin hanesan ho liafuan sira iha knananuk ne'e. Iha livru ikus husi Bíblia, apóstolu João ko'alía kona-ba grupu fiar-na'in sira ne'ebé Maromak hili ho espíritu santo: "Sira kanta Maromak nia atan Moisés nia knananuk, no mós Bibi-Oan nia knananuk." Saida mak knananuk furak ne'e? "Maromak Jeová, Ida ne'ebé Kbiit Boot Liu Hotu, Ita-nia hahalok sira mak boot no furak. Liurai rohan-laek, Ita-nia dalañ sira mak iha justisa no loos. Jeová, sé mak sei la hamta'uk Ita no fó hahi'i ba Ita-nia naran? Tanba Ita de'it mak laran-metin."—Apk 15:2-4.

<sup>16</sup> Ohin loron iha mós Maromak nia atan sira ne'ebé livre ona. Sira la'ós de'it hafolin Maromak nia kriasauñ maibé mós ninia ukun-fuan sira. Ema husi nasaun barak sai livre iha dalan espiritual. Sira ketak husi mundu fo'er ne'e tanba sira hatene no halo tuir Maromak nia ukun-fuan sira ne'ebé loos. Tinan-tinan, ema rihun ba rihun sai husi mundu atat ne'e hodi hela hamutuk iha Jeová nia organizasaun ne'ebé moos no hatudu hahalok loos. Lakleur tan, bainhira Maromak hala'o ona ninia tesi-lia ba relijaun falsu no mundu atat ne'e, sira sei moris ba nafatin iha mundu foun ne'ebé iha hahalok loos.

#### (Éxodo 15:20, 21)

it-2-E p. 454 par. 1

#### Músika

Dala barak ema Izraél nia grupu kantadór sira kanta troka malu. Dalan sira kanta mak, grupu primeiru kanta liña ida, depois grupu segundu kanta fali liña tuirmai. Se lae, ema ida de'it mak kanta, depois, grupu ida kanta hodi hatán tutan ema ne'ebé kanta ne'e. Ida-ne'e mak iha eskritura sira bolu hanesan "hatán". (Ex 15:21; 1Sa 18:6, 7) Salmo balu, hanesan Salmo 136, hatudu katak sira kanta iha dalan hanesan ne'e. Bíblia nia esplikasaun kona-ba grupu kantadór rua ne'ebé temi iha Neemias nia tempu ne'ebé kanta knananuk agradese nian, no kanta hodi inaugura Jeruzalein nia moru, hatudu katak sira mós kanta iha dalan ne'ebé hanesan.—Ne 12:31, 38, 40-42.

**it-2-E p. 698**

## **Profeta feto**

Miriam mak feto primeiru ne'ebé Bíblia temi nu'udar profeta. Maromak fó sai mensajen balu liuhusinia, karik liuhusi knananuk balu. (Ex 15:20, 21) Tan ne'e, Bíblia hatete katak nia no Arão ko'alia ba Moisés: 'Jeová mós ko'alia liuhusi ami, loos ka lae?' (Núm 12:2) Jeová rasik mós ko'alia liuhusi profeta Miqueias katak nia "haruka Moisés, Arão no Miriam" ba povu Izraél kuandu nia lori sira sai husi Ejitu. (Miq 6:4) Maski Miriam hetan knaar es-pesiál atu fó sai kona-ba Maromak nia liafuan, tuir Maromak nia haree, ninia pozisaun nu'udar profeta mak ki'ik liu fali Moisés. Bainhira Miriam halo buat ne'ebé la loos, nia simu kastigu ne'ebé todan husi Maromak.—Núm 12:1-15.

## **Ke'e no hetan buat murak husi Bíblia**

### **(Éxodo 16:13)**

**w11-E 9/1 p. 14**

#### **Hakarak hatene?**

**Tanbasá mak Maromak hili atu fó manu-kiukae ba ema Izraél atu han iha rai-fuik maran?**

Bainhira ema Izraél sai husi Ejitu, dala rua Maromak fó sira manu-kiukae barak tebes atu sira bele han na'an.—Ex 16:13; Núm 11:31.

Manu-kiukae mak manu ne'ebé ki'ik de'it, maizumenus naruk sentímetru 18 no todan grama 100. Manu sira-ne'e fó tolun no haboot sira-nia oan iha parte barak husi Ázia oeste no Europa. Iha tempu malirin sira sempre semo dook ba África Norte no Arábia. Durante tempu ne'e, baibain manu-kiukae barak tebes semo husi Tasi Mediterráneu nia sorin leste hodi semo liu rai-maran Sinai.

Tuir *The New Westminster Dictionary of the Bible*, manu-kiukae "semo lalais no aproveita anin, mai-bé se anin huu ba diresaun seluk, ka se manu sira-ne'e sai kole tanba semo dook tebes, manu lubun tomak ne'e sei monu ba rai, no toba bilán de'it." Antes atu semo fali, sira presiza deskansa iha rai ba loron ida ka rua, no fasil tebes ba ema atu kasa sira iha tempu ne'e. Maizumenus tinan 100 liubá, rai-Ejitu esporta na'an husi manu-kiukae millaun tolu tinan-tinan.

Dala rua ne'ebé ema Izraél han manu-kiukae mak fulan balu depois tempu malirin. Maski manu-kiukae sempre semo iha área Sinai iha tempu ne'ebá, maibé Jeová mak ida ne'ebé 'halo anin mosu' atu manu sira ne'e bele bá iha ema Izraél nia fatin.—Núm 11:31.

### **(Éxodo 16:32-34)**

**w06-E 1/15 p. 31**

#### **Pergunta husi lee-na'in**

Lakleur depois ema Izraél sai husi Ejitu, sira komesa muramura kona-ba hahán. Tan ne'e, Jeová fó maná ba sira atu han. (Ex 12:17, 18; 16:1-5) Iha tempu ne'ebá, Moisés haruka Arão: "Foti sanan-rai ki'ik ida no enxe nakonu ne'e ho maná gomor isin ida no tau ne'e iha Jeová nia oin nu'udar buat ne'ebé tenke rai ba imi-nia jerasaun sira." Bíblia dehan: "Arão halo tuir Jeová nia mandamentu ne'ebé fó sai liuhusi Moisés, no nia tau sanan-rai ne'e iha Kai-xote Sasin nia oin [fatin ne'ebé atu rai dokumentu importante sira] hodi bele rai maná ne'e ba nafatin." (Ex 16:33, 34) Maski ita bele fier katak Arão foti maná no tau iha sanan-rai ki'ik ida iha tempu ne'ebá, maibé atu tau ida-ne'e iha Kai-xote Sasin nia oin, nia presiza hein to'o Moisés halo Arka Aliansa nian no tau fatuk-belar rua iha laran.

## **17-23 AGOSTU**

### **RIKUSOIN HUSI BÍBLIA | ÉXODO 17-18**

**"Irmaun sira ne'ebé haraik an, treinu no entrega knaar ba ema seluk"**

### **(Éxodo 18:17, 18)**

**w13-E 2/1 p. 6**

#### **Moisés mak mane ne'ebé hatudu domin**

Moisés hatudu domin ba ninia maluk Izraél sira. Sira rekoñese katak Jeová uza Moisés atu dirije ninia povu, entaun sira mai hasoru Moisés kuandu iha problema. Bíblia hatete: "Povu kontinua hamriik iha Moisés nia oin husi dadeer to'o kalan." (Ex 18:13-16) Hanoin to'ok karik Moisés sente kole tebes tanba presiza rona sira ba oras barak. Mai-bé nia kontente atu ajuda ema sira ne'ebé nia hadomi.

## (Éxodo 18:21, 22)

w03-E 11/1 p. 6 par. 1

Fiar mak importante atu iha moris  
ne'ebé kontente

Mane sira-ne'e hatudu ona hahalok d'iak antes hetan responsabilidade sira. Sira hatudu ona katak sira ta'uk ba Maromak; sira hatudu respeitu ne'ebé kle'an ba Kriadór no hakarak atu halo nia kontente. Ema hotu bele haree katak mane sira-ne'e haka'as an tuir sira-nia kbiit atu halo tuir Maromak nia ukun-fuan sira. Sira odi hahalok la justisa, no ne'e hatudu katak bainhira sira hetan pozisaun boot, sira sei la sai ema ne'ebé aat. Sira sei la uza sala podér atu buka d'iak de'it ba sira-nia an ka ba sira-nia família no kollega.

## (Éxodo 18:24, 25)

w02-E 5/15 p. 25 par. 5

Laran-metin sei dirije ema laran-loos sira

Moisés mós ema ne'ebé haraik an no hatene ninia limitadu. Tanba nia sente kole hodi ajuda ema barak ho sira-nia problema sira, ninia banin-mane Jetro, fó sujestaun: Fahe knaar balu ba ema seluk ne'ebé nia bele fier. Tanba Moisés hatene ninia kbiit to'o ne'ebé, nia simu sujestaun ne'e. (Ex 18: 17-26; Núm 12:3) Ema ne'ebé komprende ninia limitadu, prontu atu fahe responsabilidade ba ema seluk, no nia la sente ta'uk katak nia lakon autoridade tanba fahe knaar ba ema seluk. (Núm 11: 16, 17, 26-29) Nia hakarak atu ajuda sira la'o ba oin iha dalan espirituál. (1Ti 4:15) Ita mós tenke sai hanesan ne'e, loos ka lae?

**Ke'e no hetan buat murak husi Bíblia**

(Éxodo 17:11-13)

w16.09 p. 6 par. 14

"Keta husik tun ó-nia liman"

<sup>14</sup> Aarão no Hur ajuda duni hodi hametin Moisés nia liman durante ema Izraél funu hasoru ema Ámalek. Ohin loron, ita mós bele buka dalan atu apoia no fó ajuda ba ema seluk, hanesan irmaun-irmán sira ne'ebé hasoru hela susar tan-

ba idade, problema ho saúde, família fó terus, sente mesamesak, ka tanba ema ne'ebé sira hadomi mate. Ita mós bele hametin ita-nia joven sira tanba sira hasoru beibeik tentasaun atu halo buat ne'ebé sala ka atu sai ema susesu iha Satanás nia mundu. (1Ts 3:1-3; 5:11, 14) Koko atu hatene d'iak liután ema seluk iha ita-nia kongregasaun, iha serbisu haklaken, bainhira han hamutuk, ka iha tempu ko'alia ho ema seluk liuhusi telefone.

## (Éxodo 17:14)

it-1-E p. 406

**Livru sira ne'ebé parte husi Bíblia**

Livru sira ne'ebé Moisés hakerek mak husi Maromak. Maromak leno Moisés atu hakerek livru sira-ne'e, tan ne'e, livru sira-ne'e mak parte husi Bíblia no fó matadalan oinsá atu halao adorasaun ne'ebé loos. Ita hatene ida-ne'e liuhusi evidénsia ne'ebé ita hetan iha livru sira-ne'e nia laran. La'ós tanba Moisés nia hakarak rasik mak nia sai nu'udar ulun-na'in ba ema Izraél. Tuir loloos, foufoun, nia dada an tebes atu simu knaar ne'e. (Ex 3: 10, 11; 4:10-14) Maromak mak ida ne'ebé foti Moisés no fó ba nia kbiit atu halo milagre boot sira to'o Faraó nia amlulik sira ne'ebé halo masonik mós rekoñese katak buat ne'ebé Moisés halo mai husi Maromak. (Ex 4:1-9; 8:16-19) Tan ne'e, la'ós liuhusi Moisés nia hakarak rasik mak nia sai nu'udar lia-na'in no hakerek-na'in. Maibé, tanba nia halo tuir buat ne'ebé Maromak haruka nia atu halo, no tanba kbiit husi espíritu santu mak nia ko'alia no tuirmai hakerek parte sira husi Bíblia.  
—Ex 17:14.

## 24-30 AGOSTU

**RIKUSOIN HUSI BÍBLIA | ÉXODO 19-20**

**"Oinsá Ukun-Fuan Sanulu kona Ita"**

**(Éxodo 20:3-7)**

w89-E 11/15 p. 6 par. 1

**Ukun-Fuan Sanulu kona Ita oinsá?**

Ukun-fuan haat primeiru hatudu kona-ba ita-nia responsabilidade atu halo ba Jeová. (1) Nia

mak Maromak ne'ebé ita tenke adora. (Mt 4:10) **(2)** Ema ne'ebé adora nia labele uza estátua. (1Jo 5:21) **(3)** Ita tenke uza Maromak nia naran iha dalan ne'ebé di'ak no ho respeitu, la'ós iha dalan ne'ebé la hatudu respeitu. (Jo 17:26; Rom 10:13) **(4)** Iha ita-nia moris tomak ita tenke fokus ba serbisu sagradu. Ne'e ajuda ita atu la hanoin katak ita mak ema loos liu.—Ebr 4:9, 10.

### **(Éxodo 20:8-11)**

### **(Éxodo 20:12-17)**

w89-E 11/15 p. 6 par. 2-3

### **Ukun-Fuan Sanulu kona Ita oinsá?**

**(5)** Bainhira oan sira halo tuir sira-nia inan-aman, família nafatin iha unidade, no mós bele hetan bensaun husi Jeová. No ita bele hetan esperansa ne'ebé furak husi "ukun-fuan primeiru ne'ebé fó sai hamutuk ho promesa ida"! Ne'e la'ós de'it "atu imi bele hetan buat di'ak" maibé atu "imi bele moris naruk iha rai". (Ef 6:1-3) Agora ita hela iha "loron ikus sira" iha sistemaaat ne'e. Maibé se oan sira halo tuir inan-aman, sira iha esperansa atu moris ba nafatin.—2Ti 3:1; Jo 11:26.

Domin ba ema seluk sei hanetik ita atu la halo hahalok aat hanesan **(6)** oho, **(7)** adultériu, **(8)** na'ok, no **(9)** bosok. (1Jo 3:10-12; Ebr 13:4; Ef 4:28; Mt 5:37; Prv 6:16-19) Maibé Ita-nia motivu mak saida? Ukun-fuan **(10)** atu la kaan ema seluk nia sasán, fó-hanoin fali mai ita katak Jeová hakarak ita-nia motivasaun iha laran sempre loos tuir ninia haree.—Prv 21:2.

### **Ke'e no hetan buat murak husi Bíblia**

### **(Éxodo 19:5, 6)**

it-2-E p. 687 par. 1-2

### **Amlulik**

**Arranju kona-ba amlulik iha tempu Kristaun.** Jeová promete katak se Izraél halo tuir nafatin Maromak nia aliansa, sira sei sai "amlulik ne'ebé ukun nu'udar liurai no sai NASAUN santu ida" ba Jeová. (Ex 19:6) Maibé, arranju kona-ba amlulik sira husi Arão nia jerasaun sei kontinua to'o de'it amlulik boot ne'ebé sira reprezenta to'o

mai. (Ebr 8:4, 5) Arranju ne'e sei kontinua to'o aliansa Ukun-Fuan nian remata ona, no aliansa foun hahú. (Ebr 7:11-14; 8:6, 7, 13) Foufoun, knaar atu sai Jeová nia amlulik no serbí iha ninia Ukun ne'ebé nia promete, ba de'it ema Izraél, maibé ikusmai ne'e mós loke ba ema husi NASAUN sira seluk.—Aps 10:34, 35; 15:14; Rom 10:21.

Tanba ema Judeu uitoan de'it mak simu Kristu, NASAUN ne'e labele sai nu'udar liurai no amlulik sira iha Maromak nia Ukun, no labele sai NASAUN ne'ebé santu. (Rom 11:7, 20) Tanba ema Izraél la halo tuir Maromak, Maromak fó avizu ba sira tinan atus ba atus antes ne'e liuhusi profeta Oseias: "Ha'u sei la simu tan imi atu serbí nu'udar ha'u-nia amlulik, tanba imi lakohi simu koñesimentu. Ha'u sei haluha imi-nia oan-mane sira tanba imi haluha ona ukun-fuan husi iminia Maromak." (Os 4:6) Iha dalan hanesan mak Jesus mós fó-hatene ulun-na'in Judeu nian: "Maromak nia Ukun sei foti tiha husi imi no fó fali ba NASAUN ne'ebé halo tuir ninia hakarak." (Mt 21:43) Maski nune'e, tanba Jesus Kristu mak iha Ukun-Fuan nia okos durante tempu ne'ebé nia iha rai, nia rekoñese arranju amlulik nian husi Arão, no tan ne'e mak bainhira nia kura ema husi moras-lepra, nia haruka sira atu bá hasoru amlulik no halo sakrifísiu ne'ebé presiza.—Mt 8:4; Mc 1:44; Lc 17:14.

### **(Éxodo 20:4, 5)**

w04-E 3/15 p. 27 par. 1

### **Pontu importante husi livru Éxodo**

**20:5—Oinsá mak Jeová "fó kastigu ba oan sira tanba aman nia sala" to'o jerasaun sira tuirmai?** Kuandu ema ida to'o ona idade ne'ebé nia bele kaer ona responsabilidade, sira ida-idak sei simu kastigu tuir buat ne'ebé sira rasik halo. Mai-bé, bainhira povu Izraél fila kotuk no adora fali estátua sira, NASAUN ne'e simu ninia konsekuénsia to'o jerasaun sira tuirmai. No ne'e halo ema Izraél ne'ebé laran-metin mós sente ninia impaktu husi sala sira-ne'e tanba halo susar ba sira atu nafatin hatudu laran-metin.

# 31 AGOSTU–6 SETEMBRU

RIKUSOIN HUSI BÍBLIA | ÉXODO 21-22

“Haree moris tuir Jeová nia haree”

(Éxodo 21:20)

it-1-E p. 271

Hetan baku

Ema Ebreu ne’ebé na’i ba atan ida, iha lisensa atu baku ninia atan-mane ka atan-feto ho ai se atan ne’e la halo tuir ka kontra ninia na’i. Maibé se atan ne’e mate tanba baku ne’e, atan nia na’i mak sei hetan kastigu. Maibé se atan ne’e moris hela ba loran ida ka rua ne’e hatudu katak na’i ne’e la iha hakarak aat atu oho ninia atan. Na’i ne’e iha direitu atu fó kastigu tanba nia sosa atan ne’e “ho ninia osan rasik”. Mane ida baibain sei nunka hakarak atu halakon buat ne’ebé ninian no folin boot, tanba ne’e sei estraga ninia an rasik. No mós, se atan ne’e moris hela ba loran ida ka liu, iha possibilidade katak nia mate la’ós tanba baku ne’e, maibé tanba razaun seluk. Tan ne’e, se atan ne’e moris hela loran ida ka rua, ninia na’i sei la hetan kastigu.—Ex 21:20, 21.

(Éxodo 21:22, 23)

Ivs p. 95 par. 16

Ita hafolin moris ka lae?

<sup>16</sup> Ema hotu nia moris mak folin-boot ba Jeová. Bebé ne’ebé iha inan nia kabun mós folin-boot ba Jeová. Tuir Moisés nia Ukun-Fuan, se ema ida la ho neon hakanek foto ida ne’ebé isin-rua no foto ne’e ka ninia oan mate, Jeová haree ema ne’ebé halo ida-ne’e nu’udar ohodór. Ne’e hatudu katak maski ne’e asidente de’it, maibé ema ida mate ona, entaun moris tenke troka ho moris. (Lee Éxodo 21:22, 23.) Tuir Maromak nia haree, bebé iha inan nia kabun mak ema ne’ebé moris. Entaun, tuir Ita-nia hanoin, Jeová hanoin oinsá kona-ba ema ne’ebé halo abortu? Nia sente oinsá bainhira nia haree bebé rihun ba rihun mate tinan-tinan tanba ema halo abortu?

(Éxodo 21:28, 29)

w10 15/4 p. 29 par. 4

Maromak Jeová hakarak ita atu halo buat hotu ho seguru

Lei kona-ba halo buat hotu ho seguru mós aplika ba animál ruma ne’ebé hakanek ema. Se karau ida sona mate ema ho ninia dikur, na’in tenke oho karau ne’e hodi karau ne’e la halo aat tan ba ema seluk. Tanba na’in labele han karau ne’e nia na’an no labele fa’an ba ema seluk, ne’e katak nia lakan boot hodi oho animál ne’e. Saida mak bele akontese se karau ida hakanek ema, maibé ninia na’in la tau matan didi’ak? Se karau ne’e ikusmai oho fali ema seluk, karau ne’e no *ninia na’in* tenke mate. Lei ida-ne’e halo ema ne’ebé ladún tau matan ba ninia animál atu hanoin kona-ba ninia hahalok.—Ex 21:28, 29.

**Ke’e no hetan buat murak husi Bíblia**

(Éxodo 21:5, 6)

w10 15/1 p. 4 par. 4-5

Tanbasá mak dedika an ba Maromak Jeová?

<sup>4</sup> Ema kristaun nia dedikasaun mak buat ida ne’ebé sériu tebes. Ne’e la’ós de’it buat ida ne’ebé ita tenke halo tanba obrigasaun. Entaun, oinsá mak dedikasaun di’ak mai ita? Mai ita haree oinsá mak halo tuir ita-nia obrigasaun kona-ba relasaun di’ak ho ema bele lori buat ne’ebé di’ak. Ezemplu ida mak kona-ba relasaun di’ak nu’udar belun. Atu relasaun nu’udar belun bele lori buat ne’ebé di’ak, ita tenke simu ita-nia responsabilidade nu’udar belun. Ida-ne’e envolve obrigasaun atu hanoin kona-ba ita-nia belun. Ezemplu di’ak ida iha Bíblia laran kona-ba ne’e mak Jónatas ho David. Sira mós halo aliansa atu sai belun ba malu. (Lee 1 Samuel 17: 57; 18:1, 3.) Maski ohin loran ema ladún halo aliansa atubele sai belun ba malu, maibé relasaun di’ak nu’udar belun bele sai metin liu kuandu ema sente katak sira iha obrigasaun ba malu.—Prv 17: 17; 18:24.

<sup>5</sup> Lei ne’ebé Maromak fó ba ema Izraél hatudu kona-ba relasaun seluk tan ne’ebé bele lori buat

dí'ak ba ema bainhira sira halo tuir sira-nia obrigasaun. Se atan ida hakarak atu moris seguru no hakmatek hodi sai ninia na'i nian ba nafatin, atan ne'e bele halo kontratu ne'ebé ba nafatin ho ninia na'in. Lei hatete: "Se atan ne'e hatete beibeik, 'ha'u hadomi tebes ha'u-nia na'i, ha'u-nia feen no oan sira; ha'u lakohi sai husi ne'e nu'udar ema ne'ebé livre', entaun ninia na'i tenke lori nia besik ba Maromak ne'ebé loos no tenke lori nia ba odamatan ka odamatan nia riin; no ninia na'i tenke tu'u nia tilun ho buat ida ne'ebé kro'at, no nia tenke sai atan ba nia na'in to'o tempu ne'ebé la bele sura." —Ex 21:5, 6.

### (Éxodo 21:14)

it-1-E p. 1143

Dikur

Liafuan iha Éxodo 21:14 karik hatudu katak amlilik ida mós bele mate se nia oho ema seluk, ka, katak kaer metin ba altár nia dikur mós sei la proteje ema ne'ebé oho ema seluk ho neon.—Kompara ho 1Rs 2:28-34.

### TREINU KONA-BA HAKLAKEN

w09-E 4/1 p. 31

Aman ba oan-kiak sira

"MAROMAK ne'ebé hela iha ninia hela-fatin santu mak Aman ba oan-kiak sira." (Sal 68:5) Eskritura ne'e fó sai liafuan ne'ebé kona loos ita-nia laran. Maromak Jeová hatene kona-ba ema ne'ebé presiza ajuda. Husi Ukun-Fuan ne'ebé nia fó ba povu Izraél hatudu katak nia hanoin oan ne'ebé ninia aman ka inan mate ona. Mai ita haree eskritura ne'ebé primeiru ko'alia kona-ba "oan-kiak", ne'ebé temi iha Éxodo 22:22-24.

Maromak fó avizu katak: "Imi labele fó-terus ba . . . oan-kiak." (Versíkulu 22) Ne'e la'ós avizu ne'ebé atu hatudu hahalok hanoin malu de'it, maibé ne'e mak Maromak nia mandamentu. Oan ne'ebé ninia aman mate mak hanesan kbiit-laek tanba nia

lakon protesaun no la iha ida mak tau matan nia. Ema naran de'it labele "fó-terus" ba nia iha dalan saida de'it. Iha tradusaun Bíblia sira seluk, 'fó-terus' tradús nu'udar "hanehan", "halo aat", no "aproveita". Fó-terus oan-kiak mak hahalok ne'ebéaat tebes tuir Maromak nia haree. Jeová haree ida-ne'eaat oinsá?

Ukun-Fuan ne'e hatutan tan: "Se imi fó-terus ba sira, no sira halerik ba ha'u, ha'u sei rona duni sira-nia halerik ne'e." (Versíkulu 23) Versíkulu 22 iha lian Ebraiku uza liafuan "imi", maibé versíkulu 23 iha lian Ebraiku uza liafuan "6". Entaun, lian orijinal hatudu katak ema ida-idak no mós nasaun ne'e hamutuk, iha responsabilidade atu halo tuir ukun-fuan ne'e. Jeová kontinua haree didí'ak, nia see tilun ba oan-kiak sira-nia halerik, no sempre prontu atu hatán bainhira sira husu ajuda.—Sal 10:14; Prv 23:10, 11.

Entaun, saida mak sei akontese se ema ida fó-terus ba oan-kiak to'o labarik ne'e hato'o ninia terus ba Maromak? Jeová dehan: "Ha'u sei hirus tebes no oho imi ho surik." (Versíkulu 24) Iha referénsia ida kona-ba Bíblia hatete katak liafuan ne'e iha lian orijinal mak 'ha'u-nia inus sai manas', no ne'e hanesan atu dehan katak Maromak sei sai hirus maka'as. Ita bele haree katak Jeová la fó direitu ba juís sira mak atu tesi lia ba kazu ne'e. Maromak rasik mak sei tesi-lia ba ema ne'ebé aproveita oan-kiak sira.—Deu 10:17, 18.

Jeová la troka. (Mal 3:6) Nia hadomi labarik ne'ebé ninia inan ka aman mate ona. (Tgo 1:27) Ita tenke hatene katak, Maromak nu'udar aman ba oan-kiak sira sei hirus tebes kuandu ema fó-terus ba labarik sira ne'ebé la halo sala. Ema ne'ebé aproveita labarik sira hanesan ne'e sei labele halai sees husi "Jeová nia loran hirus". (Sof 2:2) Ema aat hanesan ne'e sei hatene katak "monu ba Maromak ne'ebé moris nia liman mak buat ne'ebé halo ema ta'uk".—Ebr 10:31.